




會昌一品制集

一





據上海圖書館藏宋刻本影
印原書版框高二十二·八
釐米寬十六·九釐米



士礼居舊藏

宋刻會昌一品制集上

卷之六十六

卷之六十七

卷之六十八

余嘗謂宋刻之書雖片紙隻字亦是至寶此寶
有見而云然非癖論也百宋一廬中全者固不少缺
者亦甚多其中括出一二字皆足動人心魄即如
此會昌一品制集勵存十卷中亦有舊時鈔
補之葉向時未經取校新味暑退涼生無可消
遣輟兩日間手校于明刻本上十卷中佳處不
可枚舉鄭亞序文有句云取封禪之書於犬
子此用長卿小名也明刻訛犬爲太明人之不
學無術可說也夫

戊寅七月既望復翁識

李文饒文集序



會昌一品制集

桂管都防禦觀察處置等使正議大夫持節桂州
軍事守桂州刺史兼御史中丞上柱國榮陽郡
開國侯食邑一千戶鄭亞撰



綸綍之典載籍之始先王發號施令明罰敕法蓋本於此
也唐虞之盛二典存焉夏殷之隆厥有訓誥自胤征誓其
乃有誓命之書皆三代之文一王之法也虞夏之際代祀
綿遠其代工掌制之名氏莫得而知至于成湯太甲則有
仲虺伊尹尚之訓誥高宗得傳說則有說命之篇周公召
公相成王則有洛誥酒誥周官顧命秦始皇帝并一區宇
丞相李斯實掌其言漢興當秦焚書之後侍從之臣皆不
習文史蕭曹之輩又乏儒墨之用每封功臣建子弟其辭
多天子為之縱委於執翰者亦非彰灼知名之士武帝使
司馬相如視草率皆文章之流以相如非將相器也厥後
寢微寢長下于魏晉亦代有其人我高祖革隋文物大備
在貞觀中則顏公師古岑公文本興焉在天后時則李公
嶠崔公融出焉燕許角立於玄宗之朝帝揚繼美於代宗
之世洎憲宗皇帝英武啓運雄圖赫張中興之業高映前
古其時則先太師忠公翱翔內署有密勿贊佐之績平吳
定蜀時惟其功及登樞衡作霖雨尊王室卑諸侯圖蔡料
齊外定內理顯王言於典誥彰帝範於圖籍紀在徽冊播
於無窮特進太子少保分司東都衛公長慶中事惠皇為
翰林學士訓誥之業彰於前聞昭肅皇帝統握乾符寤寐
良弼詔淮海復升台庭盡付玄機允猷神度每彤廷奏
罷別承天啓帝亦講伊訓說命之旨定元首股肱之契以
太平之制度上古之文教咸屬於公焉會先太后懿號未

立帝明發有永懷之痛公述沙麓神井之瑞贊繞樞懷日
之慶懋遵聖緒尤慰孝思於是承命有宣懿祔廟之制及
武宗郊昊天拜清廟文物胥備朝廷有禮華夷述職河朔
修貢乃顯神休薦徽號奉揚一德以示萬方於是撰仁聖
文武至神大孝之冊封域無虞天子脩然有求玄之思乃
範貞金模聖表隆準日角燭于宮庭中外臣寮咸欲以頌
山河而褒日月也公於是有聖容之贊天街之北獯鬻攸
居因饑憑凌怙衆強禦嚴之以刀斗而勃爾無懼申之以
文告又坦然不率天子震怒旋命征之公獨運沈機上資
神斷萬里勝負決於帷中雷霆旣振犬羊遂潰疣贅披抉
腥膻解離遁其名王復我貴主公於是有討北狄之詔天
寶末薊門爲首亂之地瘡痍榛棘襲世未平至是漁陽帥
仲武掃除妖孽獲仇讎奉揚威神乃底康靖仍願勒石

於盧龍之塞以叙聖功飛章上聞帝用允若公祇應明命
舒展格言呼嘯神祇吐納嵩華當晝而文星現不寐而白
鳳來成諸侯不朽之勳尊元后無私之化公於是有幽州
紀聖功之碑潞帥劉從諫死其子因關河之險恃甲兵之
衆請爵爭地屢聞王庭中外疑迷牙撓天聽帝將耀神武
公累罄竒謀且曰重耳在喪不聞利父雄渠受戮抵以拒
君况明皇舊宮天井內地跨連河北脅倚山東豈可行有
匪人坐爲汙俗若是可忍孰不可容沃心無疑躡足乃定
又曰上黨居天下之脊當河朔之喉今漳水雄兵常山勁
卒是爲唇齒實懼因依不若乘其未萌制其將動帝俞其
奏乃妙選使臣以勞諭之嚴立刑賞以勸戒之魏侯戮力
從命絕壺關之右臂收泝水之上游獲茲渠魁在此成筭
又轅門叛將橫水餘兇竊上相之旌旗盜晉陽之筦鑰帝

怒斯赫人心愈疑咸以師老子郊臬巢尚固議罷兵者蚊
聚請宥過者雷同公又揚笏而言曰彼地則義師帥分宗
室是不勤商之邑后稷造周之邦瓜瓞具存堂構斯在
苟虧篋畫不襲仇讎則是焚彌牟逐主之風長冒頓射親
之俗詩稱築室于道書謂疑謀勿成由是洞啓宸衷大破
群議運籌制勝舉無遺冊防微慮遠必契神機授鉞之臣
伏膺承命謝安之圍碁尚劫曹參之飲酒方酣果有軍書
聞戎捷砥磨周鉞水淬鄭刀萬里未表尚之頭顱二塚
葬蚩尤之有髀歡聲雖震於朝市喜氣不見於形容何其
纂立功勲鎮定風俗若是之重也公於是有伐上黨之制
平晉陽之敕宗英可汗獻琛輸賫越自絕域通于本朝文
畢伯士胤呼韓谷蠡之師或執玉而朝靈囿或解辨而拜
甘泉並垂於史冊光彼明命公於是有諭回鶻之命五慰

望昆之書四文章等於訓傳機事出於神明固將偃仰邛
石之符傲睨鬼籍之錄聞之者可以祛孽積得之者可以
弼郡國每牙管既拔芝泥將熟常於前席親授筆札公
亦分陰可就簡如飛時有急宣關於密畫內庭外制皆
不與聞或勢功疾雷幾難終日宣室未召武帳莫開公則
䟽于封章達於旒袞當乙夜觀書之際未嘗不備美再三
此又豈可與賦洞簫而諷於後庭聞子虛而嗟不同世者
論功較德邪歲在乙丑群公常伯以天子之道貫于神祇
一年而風雨攸序災沴不作二年殲醜虜北伐之詩四年
誅狡詠東征之歌而又伐摩尼之風壞浮屠之俗偃兵
及朴四溟胥定思欲增鴻名光下武公乃觀東序之圖按
西崑之謀鋪舒名寶藻縟文質類于上帝為唐神宗公於
是纂章天成功神德明道之冊文號位既畢華夷會同方

將命禮官召儒者訪匡衡后土之議採公玉明堂之圖考
肆覲之禮於梁生取封禪之書於犬子盡皇王之盛事極
臣子之殊功而軒鼎將成禹書就掩然猶進先嘗之藥獻
高平之醫藏周旦請代之書追漢宣易名之美作為大誥
祈于昊天始終一朝紹續九德其功閎也既如彼其制作
也又如此故合武宗一朝冊命典誥奏議碑贊軍機羽檄
允兩帙一十卷輒署曰會昌一品制集紀年追聖德也書
位旌官業也歲在丁卯亞自左掖出為桂林九月公書至
自洛以典誥制命示于幽鄙且使為序以集成書尋玄珠
不究於倪域聽希聲莫窮於高下承命震惴幾移朝夕援
筆而復止者三四伏念江陸脩濫辭讓不及因齊絜以叙
焉夫全功難持大名難兼日赫於晝而乏清媚月皎於夜
而無溫煦冬之為候也則雪霜飄暴凍入肌髮夏之為用

也則金流石爍火走膚脉如陽春高秋者稀焉南則瘴風
毒虺之為厲也北則獯戎黠虜之為患也如雒邑咸秦者
幾焉鵬鷺不傳之以馳騁驂騑不授之以騫翥有如應龍者
鮮焉仲尼聖賢之宗也位止於司寇師聃道德之祖也官
不過柱史如姬旦者幾焉是以保衡傳說左右躬宗召公
畢公寅亮周室咸著大訓克為元龜書契以來未之多有
李斯以刻石紀號之文勝而不在休明之運又何足數哉
周勃霍光雖有勲伐而不知儒術枚臯嚴忌善為文筆而
不至廊廟自是已降其類寔煩惟君蘊開物致君之才居
元弼上公之位建靖難平戎之業垂經天緯地之文粹乎
厥躬慶是全德蓋四序之陽春九州之咸維品彙之應龍
人倫之姬旦也後之學者其景行之謹序

累鑿奇謀一作累
獻忠謀一作累

獻奇謀文質一作
文華一作文采



徽冊 讚

上尊號玉冊文二

仁聖文武至神大孝皇帝真容讚 并序

上尊號玉冊文 會昌二年 奉敕撰



維會昌二年歲次壬戌四月乙丑朔十四日戊寅攝太尉光祿大夫守司空兼門下侍郎同中書門下平章事臣德裕銀青光祿大夫守尚書左僕射兼門下侍郎同中書門下平章事臣夷行金紫光祿大夫尚書右僕射兼中書侍郎同中書門下平章事臣拱銀青光祿大夫守中書侍郎同中書門下平章事臣李紳及文武百官金紫光祿大夫檢校司徒兼太子太保臣僧孺等六千五百七十四人言臣聞義皇首太古之號成湯顯甚武之稱我高祖皇王是

會昌一品制集卷第一

一

四

憲尊名若古貽厥丕訓為孝孫之法豈不善始善述哉矧乃巨唐受命繼體承業理運將至大君以興昊穹所以開至聖也曩者明兩未定帝華不協捨省傳聖深惟至公先后所以昭天命也亦猶堯發於唐侯文興於代邸神明之祚不其難哉伏惟皇帝陛下清明溥邕光耿四海立德莫鄰天休大賚日角見表氣志如神爰初定命正心理物如辰居極而天下無邪矣由是昭德塞違尊賢遠佞禹不自滿成不敢康罔盤于田不邇于色自闔壺以施王教由家道而刑國風去比周覈名實擗權綱擇聖紀修舊典協誠質崇嘉壇款泰一進正臣以端理表禮故老以求謹言遠無蔽獄近無留命祈立祖而膏雨降祀靈岳而嘉穀登省刑罰而蓬宇消發倉廩而冬蠶頓息去歲龍旂承祀大輅親郊捧玉瓚而一獻光靈來格振金石而六變魄寶昭臨

然猶古訓是學緝熙于道天文炳煥雲漢其章溫恭故遜承太任之教和樂愷悌洽戚藩之心德風偃于群黎威靈動乎絕域又以敬養不逮於長樂昭配未升於禰宮每懷嗣徽蒸蒸而慕所以奉若慈訓對越兩儀因心立制永錫其教寬度劉之罪興惻隱之仁回電收霜為之反汗及單于慕義景附朔邊耀德戢兵謙臨是受至於備文物展國容莫不先甲而布甘澤丁辰而廓陰翳和景晏溫卿霽網緼斯所謂神祇之心應矣天人之際交矣於是服冕之士戴鷩之倫暨藩侯邦伯黃髮鮐背不謀而進曰陛下玄明天粹輝光日新大矣孝熙四極爰臻誠宜玉版溫潤鏤鴻明之德神寶焜耀薦萬斯之年丕天大典不可辭也陛下猶謙退固拒至于三四群臣不已乃曰俞哉夫徧覆包含之謂仁極深研幾之謂聖憲度著明之謂文蠻夷震懾之謂武感而遂通之謂神無思不服之謂孝臣等不勝大願謹奉玉冊玉寶上尊號曰仁聖文武至神大孝皇帝伏惟陛下乾健不息謙尊而光樂戒其耽禽戒其荒壽乃侔於邦宗俗乃厚於成康貽燕後昆受福無疆臣德裕光祿大夫誠躍頓首頓首謹言

上尊號玉冊文

會昌五年

維會昌五年歲次乙丑正月己酉朔一日己酉光祿大夫守太尉兼門下侍郎同中書門下平章事臣德裕光祿大夫守尚書左僕射兼門下侍郎同中書門下平章事臣棕朝議大夫守尚書右僕射兼中書侍郎同中書門下平章事臣讓夷朝議大夫守中書侍郎兼戶部尚書同中書門下平章事臣崔鉉及文武百官太中大夫太常卿臣孫簡等六千二百二人言臣聞在昔周宣獫狁內侵四牡薄伐以

定王國則詩人大其功暨于漢宣北夷乖亂呼韓慕義
郅支遠遁則簡策著其美惟此二代併為中興間者開成
之末星孛如雲螟飛蔽天先帝戚之黎人懼焉乃授至聖
遺大投艱迄茲成功厥有真數伏惟仁聖文武至神大孝
皇帝表應龍翼粹合乾剛神全而正氣凝宇定而天光發
智燭千里動必察微心鏡萬機物來斯應於是五材用四
維張建中和之極綴前聖之綱重樞機修法制刑御家之
理無出壺之言銷讒邪遠巧佞斥背公之黨退好徑之人
內嚴體貌增堂陛之峻外絕締交去輔車之勢古所謂受
命於天惟舜獨也已又曰一心定而万物服惟陛下得之曩
者北狄矜功耗蠹中國種類磐牙根柢封殖異術肺腑縞
衣如荼挾邪作蠱浸淫宇內倒懸不解百有餘年既而龍
祠埋滅携國款塞質帝女蹙海疆有狼顧平城之心鯨吞

咸洛之志爰命梟將搴旗刈旃兵塵穹廬火烈荆榛颺
幘碎輜輓六羸遁逃貴主生還剗滅妖迹剗除醜類故名
王結髮冠帶入臣堅昆稽首鞮譯來獻而又姦臣放命二
紀陸梁據太行之固下窺洛邑通故絳之道旁睨近關樹
其遺孽以竊兵柄議者僉曰精甲十萬積穀十年泉魚不
察湯網宜懸陛下雄斷霆聲群疑冰釋揚清風而掃雲鼓
迅雷以破山任馮異則拔天井而振上黨仗吳漢則發突
騎而窺邯鄲壺關失險山東奪魄屬有戍邊叛將竊發參
墟人心搖蕩異議放肆陛下臨朝而言曰二寇獲罪于天
子所不捨未三旬而定晉陽纔朞年而滅潞子不以金賂
絺絺多降不勞師克粵首馳報非至德感物孰能臻於此
乎由是台宰百辟藩屏將帥上言曰成伐東夷而肅諸侯
賀景剪七國而王室乃安莫不始於武動終致刑措將以

裡上帝薦祖宗宜受鴻名以答玄貺陛下猶謙遜而五讓之勤請弗已乃屈己以俞之雲漢爲章所以昭法度也神明其德所以成教化也魏乎有功帝堯之則也勤于大道玄祖之訓也臣等不勝大願謹奉玉冊玉寶上尊號曰仁聖文武章天成功神德明道大孝皇帝伏惟陛下不有其名以保其成不德其功以戒其盈享躬宗之福致周道之平熙我玉度玉振金聲臣德裕等誠歡誠躍頓首頓首謹言

仁聖文武至神大孝皇帝真容讚 并序

仁聖文武至神大孝皇帝御極之五載氣應天和德感人心朝廷四方咸一於正以精蕩褻以道勝殘故得風雨時若螽蟴歲息銷蓬孛爲休氣驅戎狄爲懷人北荒堅昆重譯而至厥有窘代憑阻弄兵陸梁韋顧旣伐夙沙自縛武功

旣成休德昭明前古未聞百王莫致之事皆歲蕤於圖謀矣皇上以爲大禹叙九疇敬五事豈不曰貌恭則莊視明則正予欲作績傳照審其儀形且夫聖人潛心於天以通神明先定其神而萬物理矣昔之訪具茨期姑射在此而已況乎廣成之戒抱一玄元之去多欲予所貴道良謂是矣豈眩夫係風之言竒彼淖冰之術從倥傯之所珍遺堯舜之令名哉於是圖輕素寫良金擬鑑形於止水若凝視於清鏡五彩旣彰穆穆皇皇居列仙之館近玄祖之光蓋以昭燕翼之謀顯丕承之德矣臣聞古之至聖必有竒相是以黃熊之瑞應於龍體赤精之符協於圖表頎然而長文王所以王天下也體貌多竒漢高所以威海內也然則績事之微極於惟肖至於天光睟清日華明潤非可圖也庶騁歸焉末臣奉詔敢颺言曰

唐運中興天授大君軒耀其武堯煥其文北伐獫狁朔漠
消氛西伏堅昆稽首稱臣禋生壺關盜起河汾沈機先物
雄斷解紛克定群慝竟全大勳八表旣寧萬機益勤爰命
彩績載模天真岷閬仙岑峻極秋旻蓬瀛白日光照清晨
涵育如天尊嚴若神輝赫網緼爲龍爲雲聖作物覩禎祥
以臻宣光孕靈虞熙載甄政建中和金聲玉振太階旣平
廟器乃陳化下以德持盈以仁四瀆宗海衆星拱辰億萬
斯年藻朗日新

會昌一品制集卷第一

會昌一品制集卷第二



紀功

幽州紀聖功碑銘

異域歸忠傳序

黠戛斯朝貢傳序

幽州紀聖功碑銘

并序

奉敕撰

幽州盧龍軍帥檢校尚書右僕射張公仲武往年修獻捷之禮今歲有銘勲之請二者君子賙之豈不以諸侯有四夷之功獻其戎捷春秋舊典也宗周納肅御嫌名之貢銘於楛矢天子令德也斯可以為元侯表可以為後代法聖上嘉其動而中禮乃命宰臣採其元功傳於博史臣德裕敢颺言曰夫兵者所以除暴害也愛人則惡其為害禁暴則惡其為亂雖睿智不殺化之以神至德允懷招之以禮然書

會昌一品制集卷第二

張珪

有猾夏之戒傳有脩刑之訓虞舜四罪乃成大功文王一怒以至無侮非德教之助歟仁聖文武章天成功神德明道大孝皇帝熙我文典煥乎光明極象外之微臻於至道鼓天下之動致於中和慮必鈞深退而藏密故能神機獨照伐未兆之謀威光遠震制不羈之虜當其時也烽燧迭警羽書狎至人心大搖群師沮氣皇帝以軒后之威神漢高之大略光武之雄斷魏祖之機權合而用之以定王業此議臣所以不敢望於清光也倬哉天地應而品物生君臣應而功業成故龍躍而雲從鶴鳴而子和方叔伐獫狁蠻荆來威安遠擊車師西域振服宜有良將殿于朔邊張公禮閱戰器書成傳癖張仲孝友子孺塞泉流落不耦光景未耀明主雅聞竒志持印而拜將軍遙推赤心築壇而命元帥拔自雄武授之薊門果能精誠奮發策慮偏臆千

聖獻壽一心憂國則知龍顏善將任人傑而不疑日角好
謀歎敵國而強意回鶻者本北狄之裔也或曰獯豸或曰
山戎五帝所不能臣三王所不能制前史載之詳矣暨薛
延陀之敗也首帥吐迷度率眾款塞太宗幸靈武納降立
回鶻部落置瀚海都督因我封殖遂雄北方肅宗之戡內
難也葉護以射鶻之士親護我旌亦由羌驍率師以翼周
北貊裒騎以助漢既殄大憝乃疇厥庸特拜葉護司空歲
賜緡二萬疋厥後飾宗女以配之立宮室以居之其在京
師也瑤祠雲名甲第棊布棟宇輪奐衣冠縞素交利者風
偃挾邪者景附其詔侯貴種則被我文績帶我金犀慨和
音獸珍膳竭蠹上國百有餘年既而樂駑無親天命不祐
僭侈極欲神道惡盈本國存飢蓄產耗半黠憂斯因利乘
便遂焚龍庭區落蕭條陰燐青熒今之烏介可汗亡逃失
國竊號沙漠非我冊命自為假王其來也羨漫陰山睥睨
高闕玄塞之下氛霧蔽天質貴主以前驅依大國而求援
或丐我米糲救其飢人或邀我甲兵復其故地外雖柔服
內有桀心因行人致詞徵呼韓故事願居光祿塞急保受
降城其下有二部曰赤心宰相那頡啜特勒赤心者天性
忿鷙戎馬尤盛初與名王盟沒斯首謀內附俄而負力怙
氣潛圖厲階為盟沒斯所結誘以俱謁可汗戮於帳下其
眾大潰東逼漁陽上乃賜公書書授以方略公以室韋悍
亟之兵近我邊鄙俾其偵邏且禦內侵尋以徵役不供為
虜所敗由是介馬數萬連亘幽陵伏精甲於松檮布穹廬
於磧鹵散若飛鳥止如長雲火燎于原不可嚮邇公激義
氣以虹貫發精誠而石開奇計兵權密授髦俊乃命介弟
仲至與裨將游奉窠王如清左敵萬李君慶張自榮高守

素李志操率銳兵三萬建旆而前介胄雪照戈矛林植命以義殉壯由師直聲隆隆而未洩欲逐逐而不食戢以聽命嚴而有威公曰險道傾仄且馳且射胡兵所以無敵也致之平原勒以方陳我師可以逞志也於是據于莽平環以武剛首尾蛇伸左右翼張輕騎旣合奇鋒橫騖如摧枯株如搏畜兔攝龍言者弗取陸梁者皆仆虜王侯貴人計以千數然後盡羅服聽悉數系纍谷靜山空靡有孑遺橐駝駛馱風澤而散旃墻芟幕布野畢收馬牛幾至於谷量虜血殆同於川決徑路寶刀祭天金人奇貨珍噐不可殫論乃命從事李周曠馳傳上奏又命牙門將國從玘繼獻戎俘皇帝受而勞之群臣畢賀昔長平七征驃騎六舉實憲合氏羗之衆陳湯搵城郭之兵或生靈減耗士馬物故或邀功採罪矯命專征然猶告類上帝薦功清廟顧視二漢不其

惡與以公威動蠻貊功在漏刻因命公為東面招撫回鶻使先是奚契丹皆有虜使監護其國責以歲遺且為漢謀自回鶻嘯聚靡不鳴張公命裨將石公緒等諭意兩部戮回鶻八百人雖介子討罪於龜茲班超行誅於鄯善未足儔也回鶻又遣宣門將軍等四十七人詭辭結歡潛伺邊隙公密賂其下盡得陰謀且欲馳入五原大毆雜虜公逗留其使緩彼師期竟得人病馬瘠縮劍而退挫銳解紛繫公善計今烏介自絕皇澤莫敢近邊并丁令以圖安依康居而求活盡徙餘種屈意黑車寄託遠遁流離飢凍黑車亦倚其威重迫脅諸戎造謀籍兵解仇交質自謂約齊深入漢將取而未期渡幕輕留王師往而非利公以壯猷遠馭長計羈縻不媮避嫌之便終致盡敵之術將時勤而得儻豈歲數而勝微矧乎明主仗將帥為爪牙視戎狄為鼠彘

方獵猛敵不翫細娛非周宣無以成召虎之勲非漢宣無以聽營平之計曷哉上將光我中興公前後受降三萬人特勒二人可汗姊一人都督外宰相四人其他侯王騎將不可備載王褒以日逐歸德稱爲人瑞班固以稽落盪寇大振天聲孰若天子神武百蠻振懼乘其蹙困臨以兵鋒刈單于之旗納休屠之附非萬里之伐無三年之勤巍乎成功輝焯後代宜刻金石以揚鴻休銘曰

大和之初赤氣宵興開成之末彤雲暮凝異鳥南來胡滅之徵北夷颺掃厥國土崩逼迫遷徙震我邊鄙長蛇去穴奔鯨失水上都薊門兵連千里曾不畏天猶爲驕子丐我邊穀邀我王師假我一城建彼幡旗歸計強漢郅支嫚詞狼顧朔野伏莽見羸鴈門之北羌戎雜處濺濺群羊茫茫大鹵縱其梟騎驚我牧圉暴若豺狼疾如風雨皇赫斯怒

羽檄徵兵謀而泉默斷乃雷聲沈機變化動若神明沙漠之北虜無隱情漁陽突騎燕歌壯氣赳赳元戎耿耿虎視金鼓誓衆于旄蔽地爰命介弟屬之大事翩翩飛將董我三軍稟兄之制代師之勤威略火烈胡馬星分弋回白日劔薄浮雲天街之北旄頭已落絕轡之野蚩尤未縛俾我元侯恢弘遠略取彼單于係之徽索陰山寢烽亭微橐弓萬里昆吾九譯而通蠻夷旣同天子之功儒臣蒙美刊石垂鴻

異域歸忠傳序

會昌二年四月甲申回鶻大特勒盟沒斯率其國特勒宰相尚書將軍凡十二人大首領三十七人騎士二千一百六十八人內附制授盟沒斯特進檢校工部尚書左金吾衛大將軍同正封懷化郡王其首帥徧加戎秩賜之金紫於

是穹廬之長盡識漢儀左衽之人咸被王澤矣臣聞書載
率服美大舜之功詩列既平顯周宣之德暨漢宣帝亦單
于慕義稽首來朝歷紀數千稱者三代則知非常之運必待
非常之君誠契感通斯爲難遇伏惟仁聖文武至神大孝
皇帝紹高祖太宗之神武恢憲宗穆宗之遠略英才天縱
武節霆馳靜深之謀澹然若海先定之志屹然若山自盟
沒斯歸款朔邊注心魏闕制置大略盡出宸筭漢高從善
能用六奇光武揣情坐知千里諸將無搴旗之効群臣之
借箸之籌夫天以信而成功地以定而載物惟大君懋一
德法兩儀故能懷異俗之心盛中興之業盟沒斯者回鶻
之貴酋也夙稟正性生知大義識倚伏之數明禍福之機
回鶻運屬天亡歲久不稔畜產大耗國邑爲虛流亡徧於
沙漠僵仆被於草莽由是國之將相各率支兵或入西戎
或歸諸部惟盟沒斯精誠上達天誘其衷拔自狼居之山
願拜龍顏之主封章瀝懇指日誓心不奪之誠介如石矣
先是有赤心宰相桀傲亂常頗爲邊患盟沒斯潛布誠款
於天德軍使田午暴其罪狀梟首以徇歸大國明也戴聖
君忠也去亂邦智也執醜虜義也具此四美是謂誠臣仲
尼以曾參孝因爲廣君臣父子之義以著孝經今聖主以
盟沒斯忠爰採武功貞烈之士以爲歸忠傳則聖人善誘
之道又何以加於此乎謹集秦漢以來至聖朝由絕域歸
中國以名節自著功業保終者三十人勒成上下兩卷其
不因獻款無迹可稱者今並不載臣又聞爲善者天報之
以福爲不善者天報之以殃神道昭晰應如影響自盟沒斯
方欲保大節成大勲宜乎佩服斯文以爲鑒戒臣備位台
鉉獲奉睿謀受詔序事冠于篇首

黠戛斯朝貢圖傳序

昔越裳貢雉薦於宗廟西旅獻獒陳以典訓所以感其至而也仁聖文武至神大孝皇帝御曆之四年天瑞燦爛道昭焯五材並用六轡斯柔布政宣室以張神化振兵朔野以耀威靈故得天晬而清日晏而明垂螟不生嘉穀以成中寓既安四夷來庭由是龍荒君長黠戛斯遣使注吾合素等上表獻良馬二疋絕大漠而貢赤誠涉流沙而霑赭汗非至德所感孰能臻於此乎皇帝以前有鸞旂焉用驥駮不貴龍友惟駕鼓車乃命其使見於內殿賜以珍膳錫之文錦謹按故相魏國公賈耽所撰古今四夷述黠戛斯者本堅昆國也貞觀二十一年其酋長入朝授以將軍印拜堅昆都督逮于天寶季年朝貢不絕暨中國多難爲回鶻隔礙黠戛斯忿其桀驁乘彼荐飢於是破龍庭焚薊幕蕭條万里地無種落始得出重泉而見白日披氛霧而覩青天臣伏見太宗謂群臣曰南荒西域自遠而至其故何哉宰臣房玄齡對曰殊域來朝者中國又安帝德遐被所致也太宗曰向中國不安亦何緣而至朕覩此懷懼何者昔秦始皇并吞六國漢武帝威加戎狄今殊方異類無遠不賓竊比秦漢想無多愧亦欲傳之子孫念二王之不途朕所以不能不懼爾臣伏思太宗往日之懼致我唐百八之隆則聖祖詒謀可謂深矣此太宗所以永保鴻名爲受命之祖陛下所以丕承王業爲中興之君豈不宜哉天賈耽有陳平鎮撫之才得充國通知之敏其所述古今乃詔太子詹事韋宗卿祕書少監呂述往莅賓館以展私覲稽合同異覩縷關遺傳胡貊堯離之音載山川曲折之狀條貫周備文理洽通臣伏以貞觀初中

書侍郎顏師古上言昔周武王天下太平遠國歸款周史
乃集其事為王會篇今萬國來朝蠻夷率服實可圖寫請
撰為王會圖有詔從之臣輒因韋宗卿呂述所紀異聞飾
以績事敢叙率服以冠篇首

會昌一品制集卷第二

會昌一品制集卷第三

制

宣懿皇太后祔太廟制

皇帝改名制

遣王會等安撫回鶻制

討回鶻制

討劉稹制

授王宰兼充河陽諸軍攻討使制

授劉沔招撫回鶻使制

授張仲武東面招撫回鶻使制

宣懿皇太后祔太廟制 奉敕撰

門下朕近因載誕之日展承顏之敬太皇太后謂朕曰天子之孝莫大於丕承人倫之義莫重於嗣續穆宗睿聖文

會昌一品制集卷第三

一

三

惠孝皇帝猷代已父星霜屢遷禰宮曠合食之禮惟帝深濡露之感宣懿皇太后長慶之際德冠後宮夙表沙麓之祥實茂河洲之範先朝恩禮之重中壺莫偕况誕我嗣君纘承昌運已協華於先帝方延祚於後昆思廣詒謀庶弘博愛爰遵舊典以慰孝思當以宣懿皇太后祔太廟穆宗睿聖文惠孝皇帝室率是彝訓其敬承之朕祇奉慈旨載深感咽宣示中外咸使知聞主者施行

仁聖文武章天成功神德明道大孝皇帝改名制

王者照臨萬寓名豈尚於難知敬順五行理宜避於勝伏徭諸前史義實炳然昔炎漢之興洛傍去水所都名號猶乃避之况我國家運昌土德豈可以王氣勝於君名所以憲宗繼明之初實已捨水必有冥數叶於禎祥漢宣帝柔服北夷弘宣一作恢弘祖業功德之盛侔於周宣御曆十年乃從



美併朕遠惟大漢之事近稟聖祖之謀爰擇嘉名式遵令
典庶承天意永保鴻休宜改名爲炎仍令所司擇日分命
宰臣告天地宗廟其舊名中外表章不得更有回避布告
遐邇咸使聞知

遣王會等安撫回鶻制

奉敕撰

勅自古今王撫寧荒服忠於國者則有繼絕之恩順於道
者則有固存之義所以厚其嚮化優以報功回鶻累代姻
親久修臣禮服我聲教保茲信誠嘗以國難識其忠良嚴
霜見其貞松疾風知其勁草永言勲力豈忘予懷如聞爲
紇圻斯所攻兵折衆叛畜產大耗國人荐饑流離轉徙遠
踰沙漠近因太和公主遣使入朝已知新立可汗寓居塞
下告窮請命未有所歸每念艱危載深憫惻今欲拯恤窮
困撫慰瘡痍使四方知朕不忘舊勲保其大順昔匈奴乖
亂呼韓款塞漢宣帝轉粟賑救權時施宜故得三代稱藩
北邊罷警前王令典可不務乎宜令右金吾衛大將軍兼
御史大夫王會持節充安撫大使宗正少卿兼御史中丞
李師偃充副使專往慰問仍賑米粟二萬石俾期安輯離
散漸就漠南再復舊疆永保恩好宣示中外宜體朕懷

討回鶻制

奉宣撰

門下夫天之所廢難施繼絕之恩人之所弃當用侮亡之
道朕每思前訓豈忘格言回鶻比者自恃兵強久爲桀驁
凌虐諸部結怨近鄰圻圻斯潛師彗掃穹廬瓦解種族盡
膏於原野區落遂至於荆榛今可汗亡逃失國竊號自立
遠逾沙漠寄命邊陲朕深念衰殘尋加賑恤每陳章表多
詐諛之詞接我使臣如全盛之日無傷禽哀鳴之意有困
獸猶鬪之心去歲潛入朔川大掠牛馬今春掩襲振武逼

近城池可汗皆自率勁兵首為寇盜不耻破敗莫顧
河東節度使劉沔料敵伐謀乘機制勝發胡貊之騎以為
前鋒一本作翽漢書陳侯之旗侯之旗弋彼在穴短兵鏖於帳
下元惡軼於勢中况乘匪六羸衆纔一旅儲糒已竭討日
可擒太和公主居處不同情義又絕懷土多畏亟聞黃鶴
之歌失位自傷寧免綠衣之歎念其羈苦常軫朕心今者
脫於豺狼再見宮闕上以摠宗廟之宿憤次以慰太皇太
后之深慈永言歸寧良用欣感其回鶻既已破滅義在剪
除宜令諸道兵馬並同進討河東立功將士以下優賞續
次條流處分應在京外宅及東都修功德回鶻並勒冠帶
各配諸道收管其回鶻及摩尼等莊宅錢物等並委功德
使與御史臺京兆府各差清強幹事官點檢收錄不得容
諸色職掌人及坊市富人輒有影占如有犯者並當極法
錢物納官摩尼寺僧委中書門下即時條流聞奏於戲昔
漢宣帝值匈奴乖亂推亡固存呼韓單于携國歸命入朝
保塞漢后所以有擁護之恩郵支單于背叛禮義傷毀威
重漢史所以明可誅之罪二虜禍福皆自取焉四夷百蠻
宜以為鑒布告中外深體朕懷主者施行

討劉稹制

奉宣撰

門下定天下者致風俗於大同安生人者齊法度於畫一
雖晉之藥趙家有舊勳漢之韓黥身為佐命至於干紀亂
罔不梟夷禁暴除殘古今大義劉悟頃居海岱嘗列爪牙
屬師道阻兵王師問罪三面開網一境離心乘此危機遂能
歸命憲宗嘉其誠款授以南燕穆宗待以腹心委之上黨
招致死士固護一方逮于末年已虧巨節劉從諫生稟戾氣
幼習亂風因跋扈之資以專封壤恃紀綱之力以龍襲兵符

暫展執珪之儀終無上綬之請隙駒爲喻魏豹姑務於絕
河井蛙自居孫述頗聞於恃峻誘受亡命妄作妖言中訶
朝廷潛圖左道接壤戎帥屢奏陰謀顧若卵之可矜豈泉
魚之具察暨乎沉痾曾靡哀鳴猶駐將盡之魂恣行邪僻
之志罔惑舊校樹立狡童中使挾醫莫覩其朝服近臣銜
命不入於壘門逆節甚明人神共弃其贈官及先所授官
爵并劉稹在身官並宜削奪成德軍節度使王元逵魏博
節度使何弘敬或姻連王室或任重藩維懇陳一志之誠
願揚九伐之命吳漢任職受詔而初無辨嚴卜式朴忠未
戰而義形於內况成德軍嘗以驍騎橫陣首破朱滔戰氣
方酣再回魯陽之日鼓音不息三周不注之山魏博軍亦
以大旆涉河竟殲師道建十二郡之旗鼓以列降人削六
十年之厲階盡歸皇化士賈餘勇軍有雄名必能稟鄴侯
之指蹤成葛亮之心伐咨汝二帥朕尤注懷元逵守本官
充北面招討澤潞使弘敬守本官充東面招討澤潞使潞
府曩者烈祖在藩先天啓聖符瑞昭晰績事煥於泗亭鑿
輅巡游金石刻於代邸寔爲可封之俗又爲仁壽之鄉艱
難以來頗著誠節必非同惡咸許自新其昭義軍舊將士
及百姓等如保初心並赦而不問昭義軍舊大將等如能
舍逆效順以州郡兵衆歸降者必厚加封賞如能擒送劉
稹者別授土地以報勲庸其村鄉百姓如所在團結歸順
者亦加爵賞劉悟下鄆州舊將校子孫及劉從諫近招致
將士等喻以善道宜聽朕言凡秉義立名須明大順未有
忠於所奉上悖君親昔郤至有言受君之祿是以聚黨有
黨而爭命罪孰大焉田橫能得士心人多致命伏於海島
莫敢猖狂及漢高召之奔走向闕豈嘗違拒漢使留止田

橫唯慕殉以成仁不相挺而作亂故得其王歿延殊寵光顯令名爾等既有義心宜思改悔如能感喻劉稹束身歸朝必當待之如初特與洗雪爾等舊校亦並甄酬仍委夷行劉沔茂元各務進兵同力攻討其諸道進軍並不得焚燒廬舍發掘丘墓擒執百姓以為俘囚桑麻田苗皆許本戶為主罪止元惡務安生靈於戲藩維大臣抗疏於外髦雋舊老昌言於朝戒朕以祖宗之法不可私一族刑賞之柄所以正萬邦宜用甲兵陳於原野雖朕以恩不聽群臣以義固爭詢自僉謀諒非獲已布告中外明體朕懷主者施行

授王宰兼充河陽行營諸軍攻討使制

奉勅撰

勅淮南勁兵仗灌夫之勇河內雄屏委寇恂之忠各用所

長俾專大任以茲制勝斯謂良圖忠武軍節度使銀青光祿大夫檢校工部尚書兼許州刺史御史大夫上柱國王宰結髮從軍擁旄為將一劔橫陳萬筭皆全陰則難窺勇能重閉亞夫急緩之任繼父絳侯祭彤禦侮之才為吾子路近者狂寇憑阻屢犯顏行茂元莫遑定居驟聞三捷願言奮旅方展六奇遽屬爽秋暫嬰寒泄誠威重之可倚顧計護之未任是用改爾乘軒摠齊諸校隱如敵國禦彼奔衝昔韓信建旗出井陘之隘鄧艾東馬越陰平之艱皆立奇功併為名將爾宜自勵無愧前良

授劉沔招撫回鶻使制

奉宣撰

昔東漢中夏既寧匈奴飢饉臧官請命將歸塞國刻石之功光武報云柔能制剛弱能制強且傳聞之事常參笑寶雖滅大寇不如息人朕每覽前史為之興歎又以大禹修

德有苗歸心周穆祖征荒服不至固存取亂在擇良圖回
鶻頊以本國荐飢種落携貳紇圻斯乘其衰亂遂覆危
巢旣焚老上之庭盡翦名王之族可汗失地遠害來附塞
垣朕言念姻親不忘勲力諭以呼韓款塞漢氏舊章戎不
亂華國之大典且分兵食採彼飢人令歸漠南方議賑贍
屬可汗久嬰沉痾酋長異心雖隨畜荐居固無定所而控
弦深入頗亦渝盟邊將戎臣屢抗章疏策慮偏臆咸請
驅除朕以王者之師以全取勝匈奴見短嘉婁敬之善籌
馬邑設權戒王恢之兵首推誠含垢亦已踰時况朔野迓
寒有鞞塚之患陰山遙路多曲折之艱宜以德綏豈勞兵
碎某官劉沔久臨沙漠頗識虜情旣啓十乘之行必致六
羸之遁委之告諭方俟成功可守本官充招撫回鶻使如
不自改悔終須驅逐其諸道行營兵馬使權令指揮主者
施行

授張仲武東面招撫回鶻使制 奉宣撰

門下古人云兵者所以明德除害也故舉得於外則福生
於內朕每念戎事務安生靈旣獲遠圖宜恢長筭回鶻可
汗寄託塞上未歸虜庭近者遣使薊門懇陳誠款宋人病
告於子反朝鮮心附於樓舡繫我信臣實得要領幽州盧
龍軍節度副使知節度事觀察處置押奚契丹兩蕃經略
盧龍軍等使銀青光祿大夫檢校工部尚書兼幽州大都
督府長史御史大夫蘭陵郡王食邑三千戶張仲武風雲
感契鳧藻協誠自升將壇首翦狂寇戈鋌馭聞於彗掃牛
馬殆至於谷量故能望影揣情已探致虜之術豈止聞風
破膽益堅慕義之心遽奏封章願申告諭彼旣率服寧忘
懷柔况虜騎往來疾於風電沙場曼邈介以山川臨敵應

機固難統一昔衛霍之襲葷允異道而征辛趙之擊罕美
兩從其志成予廟勝之策在舉髦傑之臣俾爾鷹揚挫其
狼顧將服蠻夷之叛固在七擒勉思將帥之風無忘五利
崇以夏官之秩委其統制之權當竭一心敬茲休命可檢
校兵部尚書兼充東面招撫回鶻使其當道行營兵馬使
及奚契丹室韋等並自指揮餘如故主者施行

會昌一品制集卷第三

會昌一品制集卷第四

授王元逵平章事制 將相

授石雄晉絳行營節度使制

贈裴度太師制 追贈

贈陳夷行司徒制

贈崔瑄左僕射制

贈王茂元司徒制

贈右衛將軍李安靖制

贈蕃維州城副使悉怛謀制

授元晦諫議大夫制 授官

授段元遜哥舒嶠等官制 闕

授徐商禮部員外郎制

授狄兼謨兼益王傅鄭柬之兼益王長史制

授鄭朗等左諫議大夫制

授鄭裔綽渭南縣尉直弘文館制

授李丕汾州刺史制

授李丕晉州刺史冀代行營攻討副使制

授王元逵平章事制

門下古之命帥必重其名假三事之崇允萬夫之望故韓信以丞相擊魏樊噲以相國伐燕克成茂功抑有前典成德軍節度使鎮冀深趙等州觀察處置兼充北面行營招討澤潞等使金紫光祿大夫檢校司徒兼鎮州大都督府長史御史大夫駙馬都尉雲騎尉王元逵生稟忠厚天資信誠竒正得於心機嚴莊表於師律去病之略無假孫吳翁歸之才實備文武屬狡童逆命自固妖巢果能颺義聲

會昌一品制集卷第四

李俊



以載馳繇直道而先奮鋒逾駭電勢盛疾雷宣務柵上據
層巒削成堙壘下臨平壤盡見秋毫始殄伏莽之戎遠拔
建瓴之險尋又陳兵原野漸阨堯山推困獸之關心碎拒
燿之怒臂弃甲者萬計折首者千人先獻戎俘益彰臣節
今則望王師之陣草木爲兵聞吾帥之風椒蘭比德顧其
殘孽豈復稽誅夫賞不逾時速人爲善雖高敷五教已列
三公而禹分兵麾宜佩相印是用命爾外于鼎司於戲昔
吳起有大功者二不爲魏相竇嬰破藩國者七未踐漢台
豈非名器之重曷嘗虛授爾其奮揚威武殲厥渠魁當感
激而成功勿遷延而翫寇服茲休命可不戒一作敬哉可檢校
司徒同中書門下平章事兼鎮州大都督府長史依前充
戍德軍節度使鎮冀深趙等州觀察處置兼充北面招討
澤潞等使散官駙馬勳如故主者施行

授石雄晉絳行營節度使制

命曰一品制集卷第四

李俊

門下兵家之策戒在勢分故楚爲三軍破於英布光武料
敵非劉尚之別營葛亮出師制魏延之異道專其大任方
見成功斷自朕心授之戎律天德軍豐州四城都防禦本
管押蕃落等使兼充晉絳行營諸軍副使銀青光祿大夫
檢校左散騎常侍豐州刺史御史大夫上柱國石雄調儻
仗一作扶義沉密有謀近者被羽先登塞旗深入翦彼葦允碎其
穹廬勇則冠軍威能振敵屬壺關逆命羽檄交馳念征虜
奉公之心思成臯過險之將嘉其壯節召自極邊旣而亞
夫會兵馳六乘之傳庶乎馬武力戰爲衆軍之鋒朕以彥
佐早升大將之壇久服上公之衮資其碩望任以指蹤鄧
禹之鎮關河功雖未遂羊祜之平吳會身不自行罷戎後
以會朝待寇寧而撫俗親授方略慰彼蒸黎爰擢奇才

付予重事爾其再申兵法奮起士心去病無以家為勿邀
天幸臧宮保於常勝寔在貴謀敬聽朕言副茲寵寄可守
本官兼充晉絳行營諸軍節度使餘並如故主者施行

贈裴度太師制

勅堯之舊臣伯益顯庸於舜禹周之元老召公流美於成
康永惟其人屬良相裴度始以謀策除害佐烈祖之中
興終以忠貞立朝毗累聖之鴻業經緯之志華皓不衰功
勳爛然圖史輝焯奸邪所忌艱危于時暨氛霧既開魚水
將叶條風孰見其喜愠零雨皆美其來歸未踐明廷遽嬰
沈痼威鳳莫翔於舊沼虛舟長往於夜川殂謝之初朋黨
異議贈典不稱人情鬱然屬告類上玄渙流大號載懷先
正且有褒崇寵既極於維師恩有加於在昔豈必望鄴侯
之壟方念茂功過梁道之祠乃思遺美以茲為勸可不
務乎可

務乎可

贈陳夷行司徒制

勅昔柳莊云亡輟宗廟之祭公叔既歿表貞惠之名前代
所以追往悼懷飾終加禮永言髦傑宜峻舊章故河中節
度晉絳慈隰等州觀察處置等使檢校司空兼河中尹御
史大夫陳夷行身為儒宗位致宰相言必體要行歸于周
得壺遂之深中持顏子之極摯信能感物桃李所以不言
思在無邪藜藿由其不採朕纘承鴻業再授鈞衡陳羣
立朝道無適莫葛亮稱物心靡重輕雖壯趾為災躡步為
蹇朕之毗倚方固始終任以建牙斬去巖廊之上射不穿
札遂居將帥之間方期永年為我良翰遽聞淪謝痛悼
于心是用遂以哀章載之簡冊言念舊德尚懷黃髮之謀
緬想貞風爰舉素絲之節以茲縟禮用慰幽魂可

贈崔瑄左僕射制

勅孔子以顏冉之行首於四科漢代以荀陳之門方於八
凱乃春時哲保茲令名用舉飾終之恩以紓穢良之歎故
山南西道節度使銀青光祿大夫檢校吏部尚書兼興元
尹御史大夫上柱國崔瑄誠明履正粹密鄰幾有子政之
精忠得公綽之不欲禮樂二事以爲身文仁義五常自成
家範往以茂器列于大僚屬賢相受誣廟堂議法用長孺
之道以右正人微京兆之言豈聞非罪既是魏其之直益
彰王鳳之邪莊色于朝群公聳視謹詞不撓淑問攸歸歷
踐名藩皆有遺愛居常御嫌名獨清則畏知爰自子矜迄于白
首厲翼之志終始不渝未陟台階實孤公望追榮左揆式
是優崇可

贈王茂元司徒制

會昌品制集卷第四

四

李俊

勅昔許穆公身歿于師贈以侯服王事加等春秋所書言
念勞旨終於盡瘁舉茲盛典用峻彝章王茂元幼則服儒
長能習吏晚爲邊將頗振軍聲近者元戎啓行大臨境
誓陟羊腸之險寧辭馬革之勞來必挫鋒去者奪魄挑戰
孤壘自揭高旌坐觀蕞火之蓬方解迎刃之竹必當罇俎
制勝枕席還師勢如風霆功在刻漏遽嬰沉痾莫展良圖
伏波之壯勇不衰呂蒙之療護無及日未回於三舍星已
旋於再周列諸葛之鼓旗徐驅而返閱祭遵之車騎悼往
則深亦旣聞其復綏是宜加於袞斂勉爾羣帥知予報功可

贈右衛將軍李安靜制

勅昔班固有言何武王嘉區區以一篋障江河用歿其身
朕常以固作一代之典非所以垂法勸後也若觀時以避
禍量力以圖全則三綱之道幾於絕矣故右衛將軍李安

靜其祖太子少師綱審諤大節炳於青史安靜聿脩厥德
不墮令名往者產祿擅朝充躬交亂每念王室殆於阽危
不憚芳蘭之焚竟全孤竹之志廣併遺老抗感憤之詞苟
不食言由忠貞之故永懷臣節遠邁前良近者深戒有司
下令遴柬惟爾苗裔靡有子遺昔庭堅不祀臧文所歎仲
宣無後魏祖興嗟榮以先正之臣褒以揚名之典懋茲休
寵用慰冥魂

贈故蕃維州城副使悉怛謀制

勅兵家之法地有必爭遠則漢氏之得陰山匈奴慟哭近
則張愿之城河外朔邊底寧乃眷維州寔爲險隘有金湯
之固居襟帶之衝沒爲戎疆垂六十載故蕃維州城副使
悉怛謀嘗解辮髮獻其壘垣議臣託以和盟沮其誠款尋
令束縛歸戮虜廷彼獲甘心且無噍類昔常山臨代爲全
趙之寶符河西絕羌斷獯戎之右臂弃茲要害用長寇讎
至今蜀人言必流涕豈陳湯之專命由斥衡之廢忠言念
始謀之惟幽枉爰加寵贈用慰貞魂

授元晦諫議大夫制

勅昔汲黯薄淮陽守願出入禁闥補過拾遺則諫爭之任
實資諒直我求其比今得正人吏部郎中元晦往在內廷
嘗感先顧奮發忠懇不私形骸俯伏青蒲至於雪涕數共
工之罪不蔽堯聰辨垣平之詐益彰文德近因旌別邪正
宰弼上言以魯公藏器莫如寘革於左右漢后輯檻孰若
列游於公卿是用命爾登于文陛爾其副我寵擢不替初
心勿沽小名以枉大節勉服官業期於有終可

授段元遜哥舒嶠等官制

授徐商禮部員外郎制

勅朝議郎殿中侍御史內供奉上柱國徐商于公以容駟
高閔虞氏以升卿名子其所全活不聞大賢猶誠感幽神
慶流苗裔矧乃祖往以淑問嘗爲理官屬政在呂宗謀傾
王室將相陷辟忠良受誣而深念郡獄之寃固拒詔使分
別楚囚之濫自履危機義激命輕仁爲己任有是陰德宜
覃後昆爾風度粹和文詞溫麗列於清憲雅有貞標旣旌
先正之忠爰舉賞延之典勉脩官業無替家聲可

授狄兼謨兼益王傅鄭東之兼益王府長史制
勅古者聖人之教子也皆妙選天下之端士以衛翼之漢
代梁王好書則以賈誼經緯之才推明其志淮陽好政則
以立成禮讓之節鎮靜其浮前王令猷百代良法况朕建
立元子錫之奧區朱邸初開黃髮是憲以兼謨慷慨納
說有爰絲正席之忠以東之取捨俟時有貢禹彈冠之操
皆行不苟合誠無暗欺歷職有聲居正無撓舉其素行擢
在首僚爾宜廣德義之風明孝愛之道俾其嚴於問寢敬
不絕馳化與心成中道若性服我休命可不勉歟

授鄭卽等左諫議大夫制

勅予欲左右前後皆得正人朝夕交戒儆予之闕所以分左
右而備箴諫也思見大儒骨鯁白首耆艾論議通古今喟
然動衆心所以增其秩而厚其祿也朝散大夫守諫議大
夫兼弘文館學士上柱國鄭卽等皆以貞正守道列于左
掖從容諷諫每竭嘉猷况卽璜近因陞見乃能廷爭執以
言責本於忠誠昔峻坂乘危爰絲攬轡期門近出次况當
車增主之明二臣之力我求端士用繼前良期爾盡規致
予無過拾遺左右汲黯之願已諧祿賜愈多貢禹之誠當
勵勉思厥職無忝優恩可

授鄭裔綽京北府渭南縣尉直弘文館制

覃之子

勅宣義郎前行京北府叅軍驍騎尉滎陽縣開國子鄭裔
綽昔漢武帝云有社稷之臣汲黯近之矣緬懷先正實邁
前良况兩代持衡皆有貞節守正去位遺風凜然爾生於
德門早服儒訓黃金不遺唯守於一經白環比德方榮於四
代嘉其勵行不墮令名俾從丹地之遊佇繼緇衣之美可

忻州刺史兼御史中丞李丕授汾州刺史制

勅賈誼云守圉扞敵之臣誠死城郭封疆聖人有金城者
比物此志也昔火焚崗而不改其貞風振野而獨標其勁
臨危自奮見義必為得不寵以名城列於上賞李丕幼而
倜儻長負不羈才耀竒而穎出智釋結而觴解禦侮是寄
益德冠於三軍騷動得人劇孟雄於一敵昔在爾祖志康
國屯翼龍而飛旣濡其雨露刑馬而誓已表於山河貽厥
孫謀載揚休問近者復生參代盜起汾川保信都之城不
為威惕戮邯鄲之使終以節全戎士間行奏章狎至閱其
忠款可謂著明乃眷西河控于大夏文侯舊壤干木遺風
以節槩著者居之固其宜也勉圖嘉績以保令名可

授李丕晉州刺史充冀代行營攻討副使制

勅晉謀元帥必有佐軍漢制出師皆立副貳所以重戎事
而肅王命也李丕頗有大慮常好竒功自為攻拒之書尤
邃揣摩之術淬其智刃研未兆之機森其禮干得備嚴之
稱暨蟬蛻丹水鵬搏赤霄未及歲暮累見誠節今以玉
壁重地汾河要津俾換珪符用佐罇俎庶乎易行而誘成
苗賁之為不胄而驅效葉公之入勉於湯寇副我知臣可

會昌一品制集卷第五



詔勅上

詔勅九有勅字者便行無勅字者請翰林添獎飾語他皆依此

賜回鶻可汗書

賜回鶻書意

賜回鶻可汗書意

賜回鶻可汗書并公主及九姓宰相詔書

賜太和公主勅書

賜背叛回鶻勅書

賜回鶻盟沒斯特勒等詔書

賜回鶻盟沒斯等詔書

賜思忠詔書

賜回鶻可汗書

奉宣撰

會昌一品制集卷第五

陳興

勅我國家統臨萬寓列塞在陰山之南先可汗惣率本部
建牙於大漠之北各安土宇二百餘年比天所以限隔內
外不可逾越近聞為紇挖斯所敗加以飢荒國邑為墟屍
僵道路今可汗稍收離散漸近邊城將議遠圖合先文誥
故茲命使宜聽朕言可汗累代以來推誠嚮國往者中原
有難助翦群兇列聖念功每加優寵寧國咸安二公主降
嫁龍庭爰及先朝復以今公主繼好又以上無絲續歲遺
縑繒恩禮轉深諸蕃榮美久保誠信兩絕猜嫌但以國家
舊章蕃漢殊壤稍逾經制豈朕所安去歲盟沒斯特勒已
至近界邊將憤激便請驅除朕念其無主可歸且令安撫
今可汗既立彼又降附便合率領漸復舊疆漂寓塞垣殊
非良計又得宰相頡干伽思等表借振武一城權與可汗
公主居住中國之制與外蕃不同須守前代規模祖宗法
度昔漢朝單于乖亂呼韓款塞宣帝送單于出朔方雞鹿



塞唯賑以米粟國初太宗皇帝命李思摩建牙於漠南遺
趾並存事皆可驗未有深入漢界借以一城與退渾党項
微小雜種同為百姓實亦屈可汗之尊貴亂中國之舊規
若以未復本蕃或欲別遷善地求大國聲援戰諸部交爭
亦須率思歸之人且於漠南駐止朕當許公主朝覲親問
事宜儻須應接必無所悒冀令彼國從此輯寧豈不謂去
危就安轉禍為福朕緣公主將可汗丹誠來告深感于衷
制置之間須存遠大故遣右金吾衛大將軍兼御史大夫
王會副使宗正少卿兼御史中丞李師偃馳往喻懷爰定
所居便申誓約神明是質豈可食言可汗宜保一心自求
多福

賜回鶻書意

奉宣撰

朕想可汗公主以久修鄰好累降嘉姻望我國家如歸親

會昌一品制集卷第五

二

陳吳

戚朕每弘容納之意固無纖芥之嫌但以將相大臣累陳
公議以可汗代居絕漠臨長諸蕃名聲旣雄部伍甚衆今
逗留塞上逼近邊城百姓不安人心疑惑耕種盡廢士馬
疲勞朕二年以來保護可汗一國內阻公卿之議外過將
帥之言朕於可汗心亦至矣可汗亦須深見事體早務歸
還所求種糧及安存摩尼尋勘退渾党項劫掠等事並當
應接處置必遣得宜惟是擬借一城自古以來未有此事
天地以沙漠山河限隔南北想蕃中故老亦合備知只如
長安東有潼關西有散關南有藍田關北有蒲關今四海
一家天子所都猶有限隔况蕃漢殊壤豈可通同且天下
者高祖太宗之天下朕守祖宗成業常懷兢畏豈敢上違
天地之限中隳祖宗之法每欲發一號施一令皆告于宗
廟不敢自專所借一城理絕言議想可汗便須息意勿更

披陳其餘令楊觀專往親喻朕意

賜回鶻可汗書意

奉宣撰

楊觀至覽表欲求糧食牛羊糧食已許自以馬價絹就振武和糴三千石緣中國以農爲本最貴耕牛百姓所畜無多常斷屠殺羊則產於北土不出中華惟塞上蕃渾各有畜牧朝廷未嘗徵率務使安存今之所求難允來意又所請束縛盟沒斯送歸者盟沒斯比自投邊將屢獻誠款自本國破亡之初奔迸先至塞上不隨可汗公主已是二年慮彼猜嫌自懷憂懼窮迫歸命望朕保持未嘗有交太上御名之言離間兩國前可汗已緣失制馭之道無兼愛之仁侵擾諸蕃肆爲暴虐所以親屬內叛部落外離國破家殘實由於此今可汗失地遠客危難之中尤須追悔前非以安反側若又仁愛不至骨肉相殘可汗左右信臣誰敢自保朕

統臨萬國非止一蕃未附者須務懷柔歸誠者固宜存撫儻徇可汗之意殊乖覆育之恩今已特許歸降止於存其種族必不別有任使授以腹心在可汗不失恩慈於朝廷免虧信義豈不兩全事體深叶良圖况前代以來盡有故事漢朝呼韓邪單于款塞其下大將烏厲屈烏厲温敦並來降附漢宣帝封以列侯又國初頡利可汗之破敗也降者甚衆酋豪首領至朝廷皆拜將軍僅百餘人無不撫納想可汗深明朕意勿更再論摩尼教天寶以前中國禁斷自累朝緣回鶻敬信始許興行江淮數鎮皆令闡教近各得本道申奏緣自聞回鶻破亡奉法者因茲懈怠蕃僧在彼稍似無依吳楚水鄉人性器薄信心旣去翕習至難且佛是大師尚隨緣行教與蒼生緣盡終不力爲朕深念異國遠僧欲其安堵且令於兩都及太原信嚮處行教其江

淮諸寺權停待回鶻本土安寧即却令如舊

賜回鶻可汗書并公主及九姓宰相詔書

朕自臨寰區為人父母惟以好生為德不願黷武為名故自彼國不幸紇圻斯所破來接邊境已歷歲年撫納之間無所不至初則念其飢歎給其糗糧旋則知其破傷盡還馬價前後遣使勞問交馳道路小小侵擾亦盡不計今則可汗尚屯近塞未議述蕃朝廷大臣與四方節將皆懷疑忿盡請興師雖朕切務食弘亦所未喻一昨數使却回皆言可汗只待馬價及令交付之次又聞所止屢遷或侵掠雲朔等州或離掣羗渾諸部未知此意終欲何如若以未交馬價且近塞垣行止之間亦宜先告邊將豈有倏來忽去遷徙不常難云隨逐水草動皆逼近城柵遙揣深意似恃姻好之情每觀蹤曰實懷馳突之計况昨到橫水柵下煞戮至多蕃渾牛羊豈恣驅掠黎庶何罪皆被傷夷所以中朝大臣等皆云回鶻近塞已是違盟更戮邊人實乖大義咸願因此翦逐以雪殂謝之冤然朕志在懷柔情深屈己寧可汗之負德終天忍於幸災石誠直久在京城備知仁一本作人心憤惋發於誠懇固請自行嘉其深見事機所以不能違阻可汗審自詢問速擇良圖無至不悛或貽後悔

賜太和公主敕書

奉宣撰

敕姑遠嫁絕域二十餘年跋履險難備罹屯苦朕每念於此良惘然恭惟太皇太后春秋已高慈愛深厚比者望姑朝再敘悲歡條已歲暮寂無音耗想姑見舊國之城邑能不錫珥望漢將之旌麾必當流涕今朔風既至霰雪已零絕國蕭條固難久處旃牆罽幕何以禦冬肉飯酪漿

且非適口朕撫臨萬寓子育群生一物未安終食三歎况
姑累年漂泊何日忘懷想姑高明必自懸鑒姑承宗廟之
餘慶為王室之懿親先朝割愛降婚義寧家國謂回鶻必
能禦侮安靖塞垣使邊人子孫不見兵革昔射獵者不敢
西向畏軫轉之臺今回鶻所為甚不循理蕃渾是朕之人
百姓牛羊亦國家所有因依漢地遂致蕃孽回鶻託以私
讎恣為侵掠每馬首南向姑得不畏高祖太宗之威靈欲
侵擾邊疆姑得不思太皇太后之慈愛為其國母足得指
揮若回鶻不能稟命則是弃絕姻好今日以後不得以姑
為詞若恃我為親稟姑教令則須便自戢斂以繼舊歡想
姑以朕此書喻彼將相令其知分更不徇非塞外祁寒且
無絲纊朕每御裘服則思彼未授衣豈可回鶻譁張遂忘
親愛今寄冬衣若干具如別錄

賜背叛回鶻勅書

一本作
詔意

奉宣撰

近數得邊將奏報知卿等本國自有離亂可汗遇禍雖未
委虛實良深震悼我國家與卿等本國代結姻好久為親
戚協德同心常為諸蕃所羨故得邊候不聳封疆晏然卿
等忽領師徒漠南屯集又數至天德侵掠頗擾邊人聚師
無名忠義俱失既乖舊好良用憮然若卿等本國所立新
主非可汗至親人心不從擾亂未定卿等只合自申方略
竭效忠誠安靖本蕃以圖勲績亦合遣使告朕具述此心
若新立可汗是中國至親人已歸附卿等便合早自相率
保國寧家與可汗協心以修舊好豈得寄命塞上文勞師
人朕緣與卿本國情義至深事同一體又緣公主在彼未
知存亡故遣使臣魏謩往諭朕意卿宜備陳誠款不得虛
詞兼禁戢師徒勿為侵軼近聞天德遊弈軍將曾有交鋒

卿等既犯塞垣亦是邊將常事今已各敕諸鎮不許交兵
卿宜曉諭部落各令知悉

賜回鶻盟沒斯特勒等詔書 奉宣撰

勅回鶻盟沒斯特勒那頡啜特勒頡于伽思於解亦阿耽
于思莫賀達干宰相伊難朱密伽諦略摩咄將軍諦略等
天德軍遞所奏表至再三省覽憂屬良深彼蕃自忠義毗
伽可汗以來代為親隣連降愛主恩禮特異古今莫及朕
君臨萬國撫育殊方苟有未安則宜來告况特勒等乃祖
乃父歸誠累朝昨遣嗣澤王溶吊冊先可汗回如聞卿國
中喪亂諸部乖離抃患恤鄰豈忘令典方圖鎮撫以命使
臣今又知堅昆等五族深入凌虐可汗被害公主及新可
汗播越他所未歸城邑特勒等力不能制思存遠圖相率
遁逃萬里歸命又知欲奉公主朝覲忠謀不從已踰大漠
之南同款五原之塞發此單使布其赤心言念艱危惻然
軫歎料卿等皆英酋貴族羈寓沙場懷土之情如何可處
豈非欲討除外寇匡復本蕃抱此至忠託於大援但緣未
知指的難便聽從又慮邊境守臣見卿忽至或懷疑阻不
副朕心故遣鴻臚卿張賈馳往安撫朕既獎卿忠款報以
信誠雖隔塞垣已如相見卿須深明朕志盡吐所懷二言
於使臣令其速還聞奏佇聞誠願續有指揮必當副彼急
難固不惜於事力勉於謀度用保忠勲秋熱卿及部下諸
官并左相阿波兀等部落黑車子達怛等平安好遣書指
不多及

賜回鶻盟沒斯特等詔 奉宣撰

勅回鶻盟沒斯特勒那頡啜特勒悉勿啜特勒烏離思特
勒赤心宰相等張賈等回知卿等欲遠赴闕庭自申忠款

眷言深志豈忘于懷聞卿等本國頃因飢荒遂至離散親族內叛諸部外侵新立可汗猶未安定既是國中所奉則為卿等君親古人云未有仁而遺其親者義而後其君者想卿等本心必思推戴况回鶻代雄朔漠威服諸蕃今已破傷足堪悲憤若皆自爭長不顧其君各據一隅必更衰弱深慮從此之後為諸蕃所輕與卿等本國代結姻親久修鄰好每念於此良用惻然與卿等為謀須務遠大莫若自相率勵同奉可汗興復本蕃再圖強盛朕欲召卿赴闕親諭此懷又恐可汗聞知謂朕幸其艱危因有招納蓋欲深全國體兼為卿等避嫌以此思之難遂來請卿等宜早歸本國不更滯留卿等表請噐甲朕君臨萬國非止一蕃祖宗舊章不敢逾越國家未曾賜諸蕃噐甲卿等亦合備知若一處開恩必自茲援例朔州般次舊例須待可汗遣馳馬迎取方令進發可汗信使未至難於遣行今有賜物具在別錄以卿等率先向化特示優恩緣新立可汗未受朝廷冊命數降使至卿等部落亦恐非宜所有賜賚止於此度想卿等明識深諒朕懷便令高品魏敬休宣諭想宜知悉

賜思忠詔書

一本作詔意

奉宣撰

呂衛等至知卿與可汗不能戰下頗擾邊疆既告諭不悛須兵勢驅逐卿忠誠奮發願立竒功請退渾沙陀等部落合勢及戰馬噐甲等並已允卿所奏各有別敕處分今令左衛將軍何清朝蔚州刺史契苾通分領蕃渾部落取卿指揮朕已切戒何清朝等令其協盡心力副卿忠誠進取之時一切取卿方略卿宜每事與弘順等商量審度事機勿為輕進但得可汗抽退不敢稽留塞上安寧即是卿之

勲力必不可落其姦計以損國威兼令高品駱遂泰權監
行營將士卿與之籌慮續續奏聞

會昌一品制集卷第五



